



Tasiilami erngup nukinganik innaallagissiorfik allilerniarlugu nukissiummik nutaamik innaallagissallu aqqutaanik pilersitseqqullugit naalakkersuisut peqquneqarnissaannik inatsisartut aalajangiiffigisassaattut siunnersuut.

(Inatsisartunut ilaasortaq Lars Poulsen, Siumut)

(Siullermeerneqarnera)

Tasiilami erngup nukissiorfiup allilerneqarnissaanik Naalakkersuisut peqquneqarnissaannik siunnersuut.

(Inatsisartunut ilaasortat Harald Bianco & Knud Mathiassen, Inuit Ataqtigiit)

(Siullermeerneqarnera)

Mingutsitsinngitsumik piujuartussamillu nukissiuuteqarneq pingaartuuvoq siunissami piujuartitsissagutta. Ukiopassuarni imermik nukissiuuteqarneq ukkatarisimavarput, ukkatarinninnerlu ingerlaqqissimalluni qanittukkut erngup nukiga atorlugu nukissiuuteqalernissap Nuummi Qasigiannuanilu aaliangerneqarneratigut.

Maanna Inatsisartuni ilaasortat arlallit siunnersuutigaat, Tasiilami erngup nukiga atorlugu nukissiuut annertusineqassasoq, tassani minguinneqsumik nukissiuuteqarneq iluaqutigineruneqarnissamat. Tamannalu isuma tunngaviatigut ajoquteqanngilluinnarpoq. Demokraatit isumaqatigaat, sapinngisamik mingutsitsinngitsumik piujuartumillu nukissiuuteqarnissarput. Qularutissaanngilarli, mingutsitsinngitsumik nukissiuuteqarneq akeqarmat. Arlaatami akilertariaqarmagu.

Taamaattumillu siunnersuuteqartut aperisariaqarpakka, siunnersuutsik qanorilillugu aningaasalersorniarneraat?

Naalakkersuisummi taamatut aamma aperigunaraluarput, taamaattumillu allannguutissatut siunnersuuteqarlutik, avataaniit inuiaqatigiinnut aningaasatigut kingunissaata misissortinniarneratigut.

Allannguutissatut siunnersuut taanna Demokraatit isumaqatigaat. Taamaaliunnginneq akisussaassuseqannginnerussamat.

Taamatut oqareerlunga, uparuartariaqarpara, Naalakkersuisut arlaleriarlutik oqarmata, Parisimut isumaqatigiisummut peqataalernerup kingunerissagaa, nunani tamalaani aningaasaateqarfiit piareersimalissasut nunatsinnut mingutsitsinngitsunik nukissiuutinut aningaasaliinissaminnut. Immaqa Naalakkersuisut itisilersinnaaruttoraat, aningaasaateqarfiit suut aammalu aningaasaateqarfiit taakku Tasiilami erngup nukinganik innaallagissiorfiliornissamat aningaasaliisussatut ilimagineqarnerisut.

Taamatut oqaaseqaateqarluta Demokraatinit allannguutissatut siunnersuut taperserparput Sanaartornermullu ataatsimiititaliami suliaassatut innersuullugu.